

海

中
絲
迹



陈碧松题



海
中
新
迹

吴仁光题



海豐縣縣誌目錄

正集卷上

序
插圖
輿圖（山川詳見續集）
都里
建置
學校
秩官
選舉
人物
列女

續集卷全

序
疆域
山川
風俗
歲時
物產
建置
建造
古蹟
選舉

海豐縣誌

目錄

正集卷下

名宦
寓賢
詞翰
邑事
賦役（物產詳見續集）
兵防
雜志
外志

名宦
人物
列女
耆壽
邑事
詞翰
變異
雜記
後序

海豐縣志序

蓋聞脩史之難無過於志旨哉斯言夫固以志也者誌也攷文徵獻而紀實以成書匪直聊且馳騁其筆墨遂自居信史而不疑也則志顧可苟乎哉抑更聞紫陽夫子守南康時先郡志爲詢其以志也者治之資也因俗以爲理端有賴焉則是邑大夫可不究心於茲哉而蒐羅折衷刊訂以示後之君子得所資以致治又謂非邑大夫之責也哉假以脩志之難而竟置於弗問其亦非宜矣知二說者可以觀于君之志乘矣夫海豐舊非無誌粵之雍正九年析坊廓石帆吉康三都

別號陸豐縣則旣海陸分土志亦應從分也于君爰取舊志而精研詳覈一纂新之俾海陸之疆理劃然海陸之事跡亦各井然爾志已告成索余弁言余披覽之下由一邑之星野山川城郭學校田賦丁徭以及忠孝節廉之大昆虫草木之微罔不條分縷晰較若列眉而又未嘗稍摭拾浮詞以悖於古信史之意務使後之君子按冊探風而穫吏治之津梁焉則余前之二說爲畢斯志之美云爾是爲序

昔乾隆拾有五年歲在庚午仲夏署惠州府事同知潮州府事金陵陸鏞撰

海豐縣志序

國之有史與邑之有志其義一也分野應乎天文山川應乎地理賦役應乎版籍學校應乎禮樂訟獄應乎兵刑名宦人物貞孝節烈應乎吏治人才考獻徵文皆於是乎在天之鍾秀不限乎遐裔況吾海豐尤嶺南所稱望邑哉粵稽三代海豐地在要服外秦平百越分設郡縣屬於南海未置爲邑置邑自漢始舊志謂晉明帝六年改隸東官殆未之攷也海豐之名郡始於唐貞觀初宋仁宗時改爲惠州元爲惠州路明爲惠州府皆以海豐屬焉嘉靖初析龍溪六圖之地爲惠來

縣本朝雍正九年又析縣東三都地爲陸豐縣蓋邑至是凡兩析矣康熙十一年二十五年屢經脩輯去今六十年字跡漫漶莫可辨識且自分邑以後未立有志舊所紀載輿圖關隘多與今不合邑之待有志蓋亟矣余以丙寅冬奉命尹茲土自惟先中丞先光祿以來十一科名繼起清白相承其不容少有隕越以負國恩而替家聲也簿書錢穀夙夜弗敢怠相其人情風土之所宜利必興弊必剔日以撫字爲兢兢三年而政成人和幸與吾邑士民相安士民亦不余棄也日謀所以頌禱而俎豆者余蓋堅却之雅不欲以市恩私矜名譽

爲事獨念邑之有志與國史相表裏者弗可闕也公餘之暇就今所分隸者按之舊本少爲增刪得書十卷以付之梓庶分邑以來後之徵文考獻者得有所助云是爲序

峇乾隆十四年己巳孟冬之吉勅授文林郎知海豐縣事金壇于卜熊撰

海豐縣誌

序

三

重印海豐縣誌序

民國十九年春余奉命出宰是邦甫至之日歲比不登赤匪充斥爲政於此救死尙恐不遑奚暇遽言興革幸群黎呼籲天憫其衷是歲大穫而地方人士復同心同德力圖自拔警隊官兵奮勇効命犁庭掃穴匪孽亦日漸肅清至是而賦茗華者得免飢寒嘆瑣尾者盡歸邦族余遂乘此時機亟與邑人謀物質與心理之建設竊以一邑之政治文化風俗民情以及地勢之險夷物產之豐嗇惟邑乘之記載爲特詳酌古準今實誌書是賴乃搜求良久不可一得詢其故僉以爲誌修有年簡斷篇殘固所不免即有什襲藏之者亦以赤匪禍起復遭秦火遂使海邑誌書等於鳳毛麟角卒由黃菊虎同志送來舊誌一帙且以續修相敦促余覽此誌乃知前清康熙乾隆同治年間前人已屢經修輯然自同治迄今又六十餘年其間邑政之純雜民俗之變遷足以供記述示來茲者又不知千條而萬緒奈余無司馬之才乏董狐之筆褒貶纂輯仍待後來賢者第以舊誌僅存倘再閱數年或數十年兵燹爲災蠹魚侵蝕並此僅存者而不存焉不幾墜緒之難尋乎李穆堂有云凡能拾人遺文殘稿而代存之者其功德與哺棄兒葬枯

骨相同夫個人之遺文殘稿且貴保存如此現一邑史乘具久遠之歷史萃全縣之精華尤爲後人所借鑑其重要更可知矣余忝宰邑政德薄能鮮不能使野無棄兒澤及枯骨捫心清夜慚愧已多若連此殘遺舊誌亦聽其散失而不爲之所是益增咎戾爰將黃同志送來原本付縣城海聲書局翻印一千部以廣流傳後之欲爲地方謀興革者徵文考獻其亦不無小補也哉今值印刷竣事因弁數語於簡端

中華民國二十年九月一日國立北京大學法學士廣東省第一屆考選縣長試署海豐縣縣長瓊東吳仁光撰

翻印海豐縣誌序


海豐縣誌一書成于前清乾隆間于君卜熊之始創而繼之于同治間蔡君逢恩之續修于是乎揚州舊治之區百粵瀕海之縣文獻所徵賴之不匱矣蓋誌者別乎史之紀年而綜乎事與

海豐縣誌


序

四


物之可紀者也周禮稱外史掌三皇五帝之書上古結繩之道既衰六書之文既備之際凡百事物史官掌之書以遺之厥後而後史因之以成也一國大事既已徵之於史焉下而至於一隅文化之異同物產之阜歉人物之代興政治之更始史之所錄不能廣收乃必有誌以私其傳鄭康成氏所謂史者博而約誌者信而詳即此意也余自民國十三年以來即斤斤留心于海豐縣誌之修訂與保存實以縣治已往之陳事未來之措施與及文化之發揚人心之挽救非賴縣志實無以揣其端不幸連年變亂赤匪爲災舊日所存之版散失無餘迨民國十九年余長海豐民國日報社筆政時得友人林君樹棠以所存正集一部見贈復得鍾君敬文借以續集當時余以事務紛繁未暇計及此舉今年地方稍告安靖百廢俱興而此縣志者更爲當務之急乃商之縣長吳君仁光重行翻印廣其留傳亦以使縣人得以明悉過去文化道德之所徵吏治政法之所異耳嗟夫今日之海豐殘破不堪伊誰之咎專制政治壓迫之後赤色恐怖摧殘之餘人心徬徨不知所詣今欲使本黨三民主義之實施者尤非藉此縣志以改造既往籌策將來發揚道德改革弊端而不可是則此縣志之翻印更爲不能容緩者矣付印之初爰書其弁民國二十年春黃菊虎序于中國國民黨海豐縣監察委員會之辦公廳




（橋念紀山中爲改現橋津龍爲前）橋念紀山中




(址 舊 寺 壽 萬 即) 部 黨 縣




(此駐署衙代歷) 府政縣



(址舊廟文即) 館書圖俗通



中 學 校



亭心湖湖南

海豐縣志

輿圖

海豐合縣輿圖

按海豐全圖幅員四百餘里極南天末形勢孤懸其背則層巒疊障其面則大壑巨洋潮之上吭惠之左臂也曩者人奪魚鹽之利旋茲兵燹之氛我國朝奠鼎以來車書一統聲教四訖惟茲巖險之地遂成禮義之邦土宇岷章視昔孔厚謹志其全圖以爲後來考鏡云

邑治之北四十里爲冷飯坑析爲三道其直北一道二十里爲新田又十里爲上護又三十里爲河田營河田營復析爲二道其直北三十里爲崙嶺又十里爲五雲峒又十里爲船埠頭過江十里爲霖田大廟則潮之揭陽界也河田營西北二十里爲螺溪又二十里爲上砂旁爲下砂又二十里爲溜砂則嘉應之長樂界也冷飯坑東北一道三十里爲三溪又三十里爲葫蘆峯又十五里爲八苑峒又三十里爲蛟溪又二十里爲龍潭則潮之惠來界也冷飯坑西北一

道二十里爲官陂塘又十里爲激石溪又十里爲崛龍逕此處最險隘者爲沙田嶺爲樟樹均則歸善海豐之交界也邑治之西一百三十里爲鵝埠分水塘則歸善界也（以上陸地）邑之三面距海東起石帆港接潮之惠來境其東置甲子巡司其西置甲子所城三十里至寧海澳外有魚尾澳洲渚延亘可以泊舟中有湖東港山勢盤曲可以避風又二十里至石橋港外有田尾澳亦可以泊舟中至碣石衛又四十里至烏坎港又二十里至捷勝所外有白砂湖遮港角亦可以泊舟中有大德港又三十里至長沙港又三十五里至謝道山謝道山離縣僅十里則邑治之門戶也（以上海濱）

海豐分縣輿圖

疆域日辟人物日繁雖海隅之邑無異中都總理恐有鞭長弗及之虞分制自無絲棼難治之慮我世宗皇帝詔分海豐三都爲陸豐縣存四都爲海豐縣經畫之周詳不遺遐遠今合縣全圖既臚於前更應於分縣之後而詳志之

海豐舊七都雍正九年析坊廓石帆吉康三都爲陸豐縣存興賢石塘金錫楊安四都爲海豐縣其分界東四十里至白沙東北五十里至伯公凹東南七十里至大德港三處與陸豐分界

西一百三十里至鵝埠分水塘西北八十里至大安峒西南九十里至小漠旺官墟南五十里至汕尾海邊北四十里至柵仔五處與歸善分界也

縣治圖

撫安瀾之禹甸成製錦之花封所以隆上都而觀萬國也由幹及枝自郡而下縣各有治縣之有治以有城有池而治也有城有池而後民安於居商安於市士安於庠兵安於伍故治也海豐屬沿海大邑凡蒞茲土者凜設險而惕復隍庶無負干城之寄謹志斯圖以當冰鑑焉

舊縣惟土城元至正後廢之明洪武十七年都指揮花茂奏立守禦千戶所千戶馬帖木築磚城高一丈五尺厚稱之週圍三百九十六丈雉堞七百八十有一關門四上有敵樓立望樓於縣署後銃櫃十一座城外環以池深廣各一丈年久池塞正德五年分守劉公璿重濬之深廣倍於舊十五年千戶李綱修四門以鐵板鉗之已而西北城樓圯嘉靖十年知縣陳一善重建已亥壞於颶風知縣劉存仁葺之戊午倭寇之警知縣張濟時加築女牆堞眼閉北門以防守三門各裏以鐵葉城外又築土圍高七尺土圍外濬溝廣二丈深七尺於東北隅砌石障溪水使入溝東南隅作一斗門障溝水使溢而後流萬歷十二年知縣陳汝鳳築偃月城增以女牆

益樓五益門五癸卯女牆圯知縣郭咸和重築之壬子六月颶風城垣銃櫃多塌知縣董繼周千戶呂慶楊共爲振理天啓丁卯春雨壞城知縣計成久葺之崇正己巳知縣周一敬於北望樓倍而廣之以爲縣署之後屏前制太狹也甲戌海寇劉香之變知縣張祚年重新銃櫃庚辰署縣事王孫蕙增修知縣陳振琦竣其事厥後城垣多圯國朝雍正十年知縣葉世美修理未竣旋圯十一年知縣王增躬親調督修理完固四門望樓銃櫃罔不整飭但環城溝池一濬於分守劉公璿再濬于知縣張濟時日久堙塞水源枯涸鑿而疏之以便灌溉以備不虞實守令之責也而工費浩繁竊有志而未逮焉

山川

山自大庾來東趨贛之安遠北亘而西越興寧南折至揭陽之境召堯(山上)盤薄跨地百餘里爲五嶺之支海豐之宗山也復自東南矗起三山亦名霖田山爲縣治東北翰又絡繹二百里許曰榦木嶂山產榦木山勢微仰而起爲蓮花峯列峯如蓮邑人擬爲九華峯之前則爲銀瓶山四時產茶

瀑布懸練峭峙千仞頂絕銳猶建瓶

倚之龍津

之源於是出焉又前十餘里爲五坡嶺曰宋文丞相方飯亭亭前有丞相祠里許至邑

曰佛子嶺踰嶺而西四十里曰蜈蚣口又六十里曰大蹊嶺連迤而下曰羊蹄嶺又西一百八十里曰楊安峒自西而北曰鵝埠嶺麓有溫泉又北曰神田嶺嶺絕險阨爲縣治西北輸其極北曰望雲嶺按史宋文丞相自潮陽移屯五坡嶺方飯元兵突至被執其長子道生及杜濟鄒鳳逸去屯於南嶺故曰望雲也又一百八十里曰五雲峒（五雲峒屬陸豐界山川屬陸豐界者若概去之則龍脉不貫特註明某山某川屬彼界）四山迴抱如碧玉環人處其中不與盤谷邑東二十里曰東保障高矗方峻與銀瓶西遮之兩保障奕然對峙又邑治二里曰龍山偃蹇蜿蜒扼住龍津水口昔山巔石壁有字云宋嘉定己卯九月九日盧少英黃澄清率同官五人泛菊於此背有龍山二字嘉靖庚寅大旱知縣陳一善禱雨輒應父老爲建祠於此祠前有觀稼亭今刻石并祠與亭俱已廢滅不可攷矣又五十里曰法留山（屬陸豐界）頂有石室唐元和末僧大顓嘗居之極東二百二十里曰旗峯狀如飛旄半枕海山爲縣治東鎮西南方入貢望此爲識云其二百五十里曰圭山甲子巡司直其下山石屹立象如執圭故名圭山或曰湖中石浮水面如龜又名龜山也（法留山旗峯圭山俱屬陸豐界）邑東南十里曰小金籠山山半有泉甘潔雖旱不絕舟人稱爲聖井南轉至長沙海口曰大金籠山距邑八十里爲縣

治南鎮二山舊俗呼爲小大雞籠宋端宗易爲金籠隋志云海豐有黑龍山是也其正南五十里有山曰雙桂以雙峰並峙秀蔚蒼翠故名

山勢自北而南水因之皆南注邑東一里爲龍津溪源自銀瓶山東流至小金籠合赤岸大小液水爲三江赤岸去縣十里其源一自激石一自掘龍逕合流於青湖岐流於新濫入於海邑東南十里爲和豐濫二十五里爲新濫一望沃野水道不通宋舟師至鑿而通之閩廣販鹽諸舶往往聚此上五里有嶺宋人築土爲階遺址猶存所謂宋師嶺也又東八十里爲東海濫（東海濫即今陸豐縣）源於吉康螺溪南流百里派分爲二東流出迎仙橋西流爲沙塘溪入於海九十里曰涌口源於黃坭坑東合蜆溪諸水入於海曰甲子門水距邑二百五十里宋景炎丁丑端宗浮海駐此舊傳海中石刻一百二十甲子其津有十八奇石屹立彷彿類人鄉人建坊於此刻於石曰登瀛（螺溪沙塘涌口蜆溪甲子門俱屬陸豐界）取十八學士之義今皆廢滅矣邑西二十里曰小液溪源於馬鞍山三十里曰大液溪源於小溪山南合流爲田心溪東會龍津諸水入於海邑南八十里爲麗江浦亦名長沙海口受龍津赤岸大小液諸水入於海曰白沙湖距邑東一百五十里又爲桑洲湖距衛東五里（山川分名及索隱見後續集）

（八景） 銀瓶飛瀑（在石塘都銀瓶山） 蓮峯疊翠（在石塘都蓮花山） 海門潮聲（在金錫都海口） 鹽江月色（在興賢都鹿境界） 龍津漁唱（在興賢都龍津橋） 鳳河晚渡（在楊安都鳳河） 長沙夜雨（在金錫都長沙） 萬壽曉鐘（在興賢都東城外） 邑有人景其得名不知何時命之者不知何人大約山川靈秀自然結撰以供吟眺耳夫尋幽摘奧固文人之韻事而投贈留題實名勝之菁華千秋膾炙亦輿圖之一大觀也

潮汐

大海在縣東南東流閩浙南通島裔抱縣治之半其潮汐晝夜再至候潮之法以太陰所纏天盤子午卯酉之位定其消長月臨於午爲長之極歷未及申酉而漸消消極復長以至子自子至午亦如之此其大較也然月臨子午卯酉時有先後潮因之故亦有晝夜早暮之候凡潮汐有五節晦與望後三日爲平潮又三日爲落潮又三日爲敗潮此自長如消者也又三日爲起潮又三日爲旺潮此自消而長者也平潮夏在辰冬在午春秋在巳其汐夏在戌冬在子春秋在亥落潮各退一時敗潮進二時起潮亦如之惟存潮汐如平潮旺潮視平潮各進一時與閩楚異地氣使然也落潮水勢漸劣敗潮魚蝦退散網罟不施起潮忌種植醞釀醫灸用之易

敗宋余襄公有言晦望前三日潮勢長後三日潮勢極大即所謂起與旺月弦之際潮之去來合沓不盡所謂敗與落俗亦曰合沓水蓋言潮勢微劣不能進退故也

氣候

邑地勢極南又瀕海陽燠之氣常泄陰濕之氣常盛陽氣泄故四時常花三冬不雪陰氣盛故晨多昏霧夜靜生涼凡嶺南之地通號瘴鄉邑之環繞皆山者瘴癘尤多海豐三面皆海惟北多山瘴癘幸少瘴候始於三月止于九月春名青草秋號黃茅春秋之季觸其氣者病類陰瘧非節飲食慎嗜欲葆元固本之有素一旦漫投以藥餌鮮有下罹其害者夏秋間炎暑如焚海底地如雷徹數十里晝夜弗止其時必有颶風甚則折木發屋飛砂爲居民大患其土氣熱鬱故多稻少麥或隆冬見薄冰鄉人以爲瑞又濕地多白蟻家有藏書者宜慎之

沿革

海豐本禹貢揚州之南裔天文星紀分野在牛女之墟春秋戰國爲百越地秦平百越屬南海晉明帝六年析南海之東爲東官郡齊因之梁曰梁化隋曰循州大業初又曰龍川唐武德五年析置安陸縣即今大安屯分屬陸豐縣治貞觀初仍併爲循州或爲海豐郡海豐之名昉此

南漢更爲禎州宋仁宗改曰惠州元至正爲惠州路明洪武戊申更爲惠州府皆以海豐屬焉
嘉靖三年析龍溪六圖之地爲惠來縣而海豐存七都國朝雍正九年析坊廓石帆吉康三都
爲陸豐縣存興賢石塘金錫楊安四都爲海豐縣君子觀邑治分合命名之沿革而古今人事
之得失世運之盛衰從可攷矣

都里

先王之制辨土以都受都以里明遠邇而驗風俗亦王政之所必周者也海豐山窠海澳
閭閻絡繹欲使編戶各安其所則井牧族黨有不容或紊者今于三都之隸于陸豐者不
煩再登其四都之屬于海豐者詳而志之於以見別疆分理今昔殊稱均道里而嚴保甲
無敢隕越焉耳

縣城內外曰興賢都（其里二其圖二）

東南曰石塘都（其里六其圖六）

南曰金錫都（其里五其圖五）

西南曰楊安都（其里二其圖二）

興賢都

東笏

下巷

埔下

五獅凹

徑口

員山

鬱口

員埔

沙崗

烏石

卓厝

陂頭園

石塘都

斜港

赤山

嶼仔

謝道山

潛洋

赤岸

田溪

台涌

青草

長沙

青湖

冷飯坑

長圳

公平

竹率

長橋

羅峯

金錫都

橫山

渡塘

高湖

楊古埔

鶴髮

平涌

桃花

赤花